

*ASO FARAILE, 22 IANUARI 2021*

*Na nofoia e le Fofoga Fetalai le Nofoa i le itula e 9:15 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono.

Ia, malo le tauatai i lenei taeao, malo foi le lagimama ma le soifua manuia.

**TULAFONO TAU FAAOFI O LE FAATATAUINA O TUPE  
FAAOPOOPO (NU.1) 2020/2021 – felafolafoaiga faaauau i luga o le  
faitauga faalua – Aso 4**

**FOFOGA FETALAI:** E tolopo le tatou Fonotaga i le aso ananafi ua maea ona saunoa le sui usufono mamalu mai Safata Sisifo. E i ai le manatu o lea ua avanoa le paia o le Palemene i lumamea mo se isi sui usufono e saunoa e tusa ai ma le tatou galuega.

Ia, tulai mai lau Afioga i le sui usufono mo Aiga i le Tai lau Susuga Mulipola, le sui usufono mo Aiga i le Tai, tulai maia e saunoa.

**Susuga MULIPOLA LEIATAUA LAKI (Aiga i le Tai):** Lau Afioga i le Fofoga Fetalai, ou te manatu o le a pale ia i galutuu seegapapa a le tupu ma le tapagai'a nai le vasa i Saute, aua o lea ua see lili'a le tama nai Vaoto ina ua tau ai o lapega, ae ua faatini foi le uto e pei o le faiva i vai. Toa ia la faavaituloto ma papa le gae ou paia talatalagata Samoa e afua mai i le siisii o le tafa o ata o le laoso, seia paia le toaiga i le gagaifo o le vaalua i le fafa o Saualii, tulou.

Tulouna le afeafe o le aufaitatalo o lo o alei vanuupoo ae sili tautu le vai o le ola aua Samoa mo le Atua. Tulouna le fala na aami o Tama ma Aiga, o Aiga foi ma Tama, ae a le usi ma le mamae na taoto aua le usoga a Tumua ma Pule, Ituau ma Alataua, Aiga i le Tai ma le Vaa o Fonoti, o Samoa ua tasi i le paia maualuga i le faleagafulu.

Ae ave lenei avanoa taua ou te faatalofa aloaia i le ee faafofoga mai o lau Afioga i Le Ao Mamalu o le Malo, lau Afioga i le Tama Tauaana, lau Afioga Tuimalealiifano Sualauvi II ma lau Masiofo. E faatalofa foi i lau Afioga i le Sui o le Fono a Sui Tofia, lau Afioga Le Mamea Ropati ma lau Masiofo.

E faatalofa i lau Afioga i le Palemia, le Taitai o le Malo ma lau Kapeneta, lau Susuga Tuilaepa Sailele Dr. Malielegaoui.

E faatalofa i le vasega o Minisita Lagolago, ae a le ee mai o lau Afioga i le Fofoga Fetalai ma le mamalu o lenei Palemene.

Ou te faatalofa foi i le afio o lau Afioga i le Faamasino Sili ma le vasega o Faamasinoga, le Tafatolu o le Faigamalo Fefaatauagai.

E le galo Afia i si ona vao i le maualuga o lenei Maota i tupu ma ee, o Ofisa Sili o Pulega o Matagaluega, Ofisa Lagolago faapea Faalapotopotoga Tumaoti a lo tatou Malo, e o lo o faia le faiva o le tautua aua Samoa ma sona manuia.

Ou te faatalofa faapitoa i le paia o si ou itumalo o faafofoga tapuai mai. I le susu o Aiga e Lua, Pouli ma Fuailefau, Usoalii ma Alo o Malietoa, ae alaalatai le fetalai ia Ati ma Lautolo, faletua ma tausii, saoa seia oo lava i le malosi o le nuu. Malo soifua ailao ua maua.

E le mafai ona galo le faatalofa i si ou nuu o Apolima, o oe na itutolu i ai Manono aua le susu o Sau ma lo latou aiga Sa Sau, susu Lilo ma Usoalii, ae alaalatai oe le mamalu ia Sauma.

E faatalofa i si ou nuu o Manono, Faleu, le susu o lau Susuga Leiataualesa e te pule i le nuu faigata, o le uluaipou o malo, le susu tutasi, o le fatuga alii e te alaala i Maota, o oe o le pae ma le auli. Ae a le susu o Usoalii faafeagai, alaalatai le Matua ia Vaisagote, le fetalai i le Tulafale o oe o le moa na fagatau, aemaise le mamalu ia Sa Mutimuti. Susu o Leiataualetaua, le paia o le falelima, susu Leota, susu Feiloivao, ae alaalatai le mamalu o le faletolu, Vaipae, Sulu ma Tuafoe, alaalatai lau fetalai i le Matua Vai ma lou pitonuu.

Ou te faatalofa faapitoa foi i le paia o le lua faaitu e susu ai lau Susuga i le alii Matua lau Susuga Taupau ma lou pitonuu o Salua, susu lau Susuga i le alii Matua lau Susuga Mulipola ma lou pitonuu o Satoi. Lua faaitu e susu ai Luatutu o oe o le Tapunuu, e susu ai Tuilaepa o le Alo o Malietoa ma lou pitonuu, ae polapuipui e le moa na vinimua, lau Fetalai Auapaau ma le falefa o Salua.

E le mafai ona galo lau faatalofa i lenei taeao i si ou nuu o Satuimalufilufi, e te fou mai i lo ta itumalo. Ne i vaea le falaooto i ou paia ma ou mamalu faaleaganuu, peitai, o tulaga i itumalo faapalota, e le mafai lava ona ou laaloa, ua leva ona ta masani, ma ua leva foi ona ta fai palota. Le afioaga e susu ai le Aloalii lau Susuga Saipaia, e susu ai Letelemaaana o oe o le tamaitai tasi o Aana, e susu ai Taito o oe o le matua taulagi, e afifio ai le paia i Tapaau ae alaalatai peipeigamalie ma lou toafa. Ae a lau tali fetalai Tuagalu faapea le mamalu ia Satuimalufilufi ma vae o le nofoafia. O ou paia na Samoa, o ou paia faaleaganuu, ou paia faale-Talalelei, paia o le Faigamalo Faafetauagai. Nuunuu atu ia faatini o tausala aua e le lanu i se gagana.

Lau Afioga i le Fofoga Fetalai, ou te manatu o lea ua tatou piioa ma tatou piinama ma tatou aleaga, ua tatou sapi i maa o malie, aua o lea ua magoto le

igafo aau mamao. O le Atua ma lana pule faasoa i le soifua ma lo tatou ola, ia faafetai i Lona agalelei. O lea ua tatou pototo moli i futiafu e tasi i lenei taeao, aua o lupe lava na vaoeseese a o lea ua fuifui faatasi. O le fesili, e mafua i se a? O se pototo ea a o se atamai o le tagata? E leai o le Atua lava na ia taitai le soifua ma lo tatou ola, o silasila mai matou matamata atu, foi le viiga i le Atua. E ui lava i le ufitia o le ao pogisa i lau Palemene aemaise le faafofoga a Samoa, le taeao o le fusialo ma le laufofoga maligi ona o mafutaga pele ma mamae i lana auaua le Afioga ia Vaafusuaga Toleafoa ua amia e le Atua. Tatou te le faanoanoa ai aua e leai se isi e tu ma tete, a o le finagalo faitoatasi o le Atua, o le ta e le agaia, o le tao e velo i le maninoa, a o se maa e togifaato i le soifua ma so matou ola, mapu atu ia i aao agalelei o lona Matai. Ia maua le mafanafana e lau Afioga i le Faletua ma le nofo a alo ma le paia o Aiga na Lua.

O lenei taeao lau Afioga i le Fofoga Fetalai, afai lava e tautala umi lau Afioga, e le itiiti le 5 tausaga sa seei ai, se i togi se maa ae se i fai se tala, i le mafutaga ua asoa, ua tausaga o tatou osiosi ma fatufatu e ala i le Faigamalo. O le seei mai e avea ma sui o Aiga i le Tai, faafetai i le Atua o lea ua tau ai o lapega. E tasi lenei Paeaiga iloga lona tulai mai, 47 sui usufono o le Vaega Faaupufai a le HRPP, toe faafoi ai Samoa mai le amataga i le One Parliament State. Talofa, sa lagona le iuleo, o fea a tua i ai le atunuu? E mafua i se a lea? Ua leai se Itu e Agaia le malo, talofa ai a tafili saunoa le HRPP. Faafetai i lau Afioga ua le o lea. Le uluai feiloaiga a le Vaega Faaupufai, sa talia se fanoga o lana Afioga i le Taitai, le leo itiiti ae malosi, “Le tatou Vaega Faaupufai, o le tatou taimi lenei. O ai a tua i ai le atunuu? O ai a agaia le Malo.” O manatu ia o le atunuu, talofa, ai a tafili saunoa le Vaega Faaupufai. Ae leai, o le aso tatou te tau atu ia Samoa, e le tau agaia le HRPP ma lana Faigamalo. O lo o i ai pulega lelei, a lea na vaaia i le faaitiitia o tulaga i a tatou Komiti Faufautua, 60% e faaitiitia ai, e le pale uma tatou i tofiga o Minisita Lagolago. A lea ua taunuu? O le vaega e totoe, tulou le malu, tou te agaia le Malo. Siaki galuega a le malo, check and balance, good governance. Faafetai i lau Afioga i le Taitai, e le galo ia saunoaga i le amataga lea e limataitaiina ai lava le Faigamalo seia oo mai lava i le aso nei.

E momoli le faafetai a Aiga i le Tai i lau susuga i le Taitai ma le Faigamalo, malo le toa, malo le faatoatoa, ai o i e sau ai le gagana e faalogoia i nisi o taimi, o lau Afioga e te pulepuletutu. E i ai lou talitonuga, so o se taitai lava e i ai se faamanuiaga faapea. O lea foi o faiai uma, tulou le Maota, o tumutumuga o nuu ma afioaga i itumalo, o lea ua i i. E leai lava la se e faatauagavale i ai, a o taimi e lualuta ai le folauga, o taimi ia e iloga ai le taitai, e fai ai lana faaiuga, e fai ma le lē fefe, e tautala ma le tonu, ua vaaia i le Nofoaiga lenei. Faamalo faafetai, e le selu atu. A o i e mafua ai ona tu matila ma iloga lau Faigamalo.

Faafetai i lau Afioga ma le Kapeneta i le taitaiga o le tatou Malo, ua manuia le atunuu, lelei le tulaga i auauaaga faa-soifua maloloina. O tulaga i aoaoga,

eletise ma le vai. E ui e le i faasopolia le 100% ona o le taumamao o nisi o aiga. Peitai, o lea foi ua tapena tulaga i le malosi faafouina mo nai aiga taumamao. Ma o faiga ia e iloga ai ma taunuu ai a tatou folafolaga ia ola fiafia, ia ola saogalemu ma ia ola manuia Samoa ma ona tagata.

Faamalo faafetai. E le itiiti le agaga faafetai i lau Afioga ma le Faigamalo, i le tele o atinae faatino i si ou itumalo. E tasi lenei sui usufono faatiga taliga i lenei 5 tausaga, faatiga fofoga i a outou Afioga. Peitai, sa faailoa le agaga na ala ai ona sau i le Maota, 20 galuega faatino i totonu o le itumalo. E mafua i la outou tofa fetalai, le tofa tatala ma le faautaga alualumamao. Ou te tulai mai i le 2016, ua savali i le 10 tausaga e le i toe inumia e le motu o Manono-tai se vai, seia vagana lou pitonuu o Salua na o sina taimi, tasi le vaiaso pe tasi i le masina faatoa maua le suavai. Faamoemoe i le tanevai le meaalofa a le Atua pe a oo ina toulu le uaga, ae a oo ina lamala, ia e sau le vaa i le ao ma le po e ki atu le tanevai i uta. Viia le Atua, faafetai i le Faigamalo.

Lau Afioga i le Minisita ma le Tamaitai Pule ma le Pulega, ua faasopolia le vai i Manono-tai, e leai se mea o toe popole ai e oo mai i le taimi nei. Na pau le popolega lea e i ai, ua tau alu i le atoa le faaaoga, o se taimi ua amata ona alu le tipiga paipa. Ae viia le Atua aua o mea na e i luga o le fua a le tagata e fai i ai lana fua faatatau ma ua uma foi ona oo i ai le sui usufono e faailoa i ai vaega ia, ia fiafia i le faaaogaina o le vaitaumafa ma fuafua lelei lona faaaogaina, aua o lea o le a ou le toe faipule, ae agai i nisi sui usufono o fougou mai.

Lau Afioga ua sua faataamilo foi se tasi o vai i le pitonuu o Faleu-uta i Manono-uta, faatasi ai ma moli e 14 ua faasopolia ai uafu laiti i tai i le motu, faatasi ma moli e alu i le la, e ova ma le 20 moli ua faasopolia ai tulaga i Ekalesia e fia i le motu ma uta, faapea foi i luga o uafu.

Lau Afioga i le Fofoga Fetalai, e anoanoai galuega faatino a lenei Paeaiga. O aga ia a le itumalo ua leva ona galala, mafua ina ua sese Vaega Faaupufai e agai i ai, a o lea e tulai le Malo. I lenei 5 tausaga lau Afioga ua inu malie le itumalo.

E 2 malae taalo ua faatino e le Matagaluega o Aoga, lau Afioga i le Minsita, faamalo ua maea le malae taalo o le matou nuu o Manono, o la e foi ua faagaoioi le malae taalo o le afioaga o Mulifanua. Ua faatino le tulaga i le evacuation centre i Lepuia i Manono-tai e tauala atu i le ADRA. O nisi ia o vaega o lo o lavea i totonu o poloketi a le tatou Malo, i le faasoaa a le tatou Malo i mea o lo o faatino, faatasi ma nisi o galuega o lo o fuafua aua aiga e le o lelei maota ma laoa. Faatino le tulaga i lou faleaoga 11 potu e tauala atu i le JICA, le Malo o Iapani i luga o faiga paaga ma le tatou Malo.

E 2 fale komiti ua faatinoina i le itumalo o Lalovi ma Salua Manono-uta, e tauala atu i le Ofisa o Ausetalia. E afua nei faamanuiaga uma i luga o Faigamalo lelei, faiga paaga ma le Malo o Ausetalia.

Lau Afioga i le Minisita o Faatoaga ma Faigafaiva, faafetai mo tosovaa ua uma ona fausia, o lo o talia tulaga i a tatou marine lights aua le

faatonutonuina o le agai mai uta o vaa, aemaise foi vaega e paulia ai vaa i le agai i tai i le matou motu.

O tulaga i faleui, garden toilets pei ona faatino i le uafu i Manono-uta. O le taimi nei o lo o faagaioioi i le tulaga i le fale faatali pasese faatasi ma le toe sosooina o le uafu e auala mai i le SPA. Faamalo i lau Afioga i le Minisita aemaise o le auala ua uma ona faata mo lou aoga maualuga le Kolisi o Aana i Apolima, ua manuia uma ai le itumalo, e manuia ai alo ma fanau aemaise o faiaoga e autovaa atu aua le aoaoina o alo ma fanau.

O ala ia lau Afioga i le Fofoga Fetalai e le mafai ai ona galo ai le agaga faafetai i lenei taeao, e tusa o galuega ua maea faatino e le tatou Malo. E i ai nisi o galuega o fuafua i le tulaga i auala i le faleaoga o lou nuu i Satuimalufilufi, ia alofa ane lau Afioga i le Minisita, i se taimi faataunuu pei ona tatou feutagai. A o lou nuu i Manono, ia o lo o talitali lava, masalo lava lava e tuai ae oo mai le tulaga pei ona i ai le tatou talosaga i le 200 eka e galulue ai o tatou nuu. Aua o tatou o lea e taunuu ai le upu ua lumafale i le moana ae tuafale i le papa, ia aemaise foi le suiga o le tau pei ona i ai. Ia atonu o le isi Paeaiga ua matuu mai se finagalo o lana Afioga faapea le tatou Faigamalo.

O tulaga i auala faataamilo ma lou taligalu i le motu o Manono-tai, tasi lenei taligalu e le i misi lava se tausaga o ou lauga ai. A silasila i ai ua matua faaleagaina le faataamilo o le motu lenei ma ua tele le lamatia o le soifua o i latou o e o lo o nonofo ai. E pei ona tatalo foi i le Minisita sa tulai mai foi i lea vaitaimi i le Punaoa Faalenatura ma le Siosiomaga, ina ia alofagia le taligalu lea faataamilo i si o matou nuu. O le nuu lea o Manono-tai e tasi lava le aso Gafua i le masina e o ai le malosi o le nuu e lau le maa, e tau fatufatu ai ma puipui le taligalu, ona avatu lea o nai sima, e sao sima toeaia e tau faasima ai tau ina talitali ae le gafatia. A oo ina sau le Tsunami, ia, o pulufana afi ia, tulou le gagana, aua o le maa e faigofie ona ave e le galuafi ma faatamaia ai le soifua. E taatia atu i lau Afioga i le Taitai se i e alofa ane i se taimi, a tatou taumavae, ae ou te talitonu e le galo le talosaga a Aiga i le Tai e pei ona faaoo atu.

Ia, lou itumalo, o le a le malosi o le galue a le tagata, a o le upu lava a le Tusi, “O tatou o auauna le aoga.” O le a se mafai ua mafai ai le tautua a le Faigamalo i le tatou itumalo, ia, matou te faamalulu atu ma asuasua atu malu i puega i se tautua ua le au, se mafai ua i ai, tau lava ina faitau ane ai o lo o i ai se o faapisapisao i le Maota lenei a o i ai lenei 5 tausaga ua tau maea.

Lau Afioga i le Fofoga Fetalai, e manatu ua maea le tulaga i galuega o lenei 5 tausaga. E le itiiti le agaga faafetai i lau Afioga i le faafoefoeina o lenei Maota, o faiva e le faigofie ma o faiva e le soona seei ai se isi. O lea ua lava le tofa, aemaise o le tofa faa-toeaina, aua e le faigofie le Maota. E i ai taimi e naunau ai i le i’ a ae galo ai le upega, leaga e faigata a oo ina tulai, segia mauili i mauili tapuai o le itumalo. O le ala lea o le naunau i nisi o taimi, peitai, e mau lava le toovae i lau Afioga. Faamalo faafetai, o le a misia e

lenei Palemene, aemaise se Nofoaiga o fougou mai lau Afioga. Faamalo le tofa, faamalo le uta, faamalo le onosai. O oe o le matua faitama, e tua atu ia te oe lau Palemene. Aua a oo lava ina sii lou aao i le mea e te finagalo i ai, e faia lava. Peitai, ua le o lea, ua faaoga lava lo tatou va nonofo ai, e tausii ai le Maota lenei. Faamalo, o le matou tatalo ia i ai le agalelei o le Atua, maua lou soifua laulelei i le tino, a ia faasilisili i le mafaufau ma le agaga.

E le ititi le agaga faafetai ia outou Afioga o Ofisa Sili o Pulega o Matagaluega ma Faalapotopotoga Tumaoti a le Malo. O Ofisa Sili o Pulega ma Ofisa sili Lagolago ma le malosi o le Matagaluega i ofisa taitasi, aua o le malosi lea o le tatou Malo. O le a se naunau o le Taitai ma le Kapeneta ma le Faigamalo, e le tau so matou faamoemoe. I la outou tautua matavela, tautua tuavae, tautua le pao, a lea ua tino i le tele o galuega e pei ona sapi ai si ou itumalo. E mafua i la outou tuualalo ma fua i lo outou galulue i le ao ma le po, e faamalo. E faamalo le fai Taitai, e ui lava ina matou laiti, ae matutua nisi o outou o le aufaigaluega, talofa, sa outou tali lava i le tele o taimi. E faafetai le faaaloalo, faafetai le faatupu ma le faatamalii. Ia i ai le agalelei o le Atua i galuega faaauau o lenei tausaga, aemaise le Paeaiga o fougou mai.

Ona faapea lea o se matou tala, lou itumalo e, o upu lava e masani ai, o ai lava le tautai e faafia atamai, a le lava tapena, a sasi taga e fai i le vasa ona ae fua lea o le faiva. A faaletonu foi aga e fai i le tuavao, ona ae fua lea o le seuga. E asuasuu atu vai malu i puega, se tautua le a'u, afai ua le soo lou pale, le a'u lou titi, o le tagata lava e le atoa, a o le Atua o Ia o le atoatoa na te faaatoa so tatou le atoa. Faamagalalo se laa ua le tau tamalii, faamagalalo se tu ma se aga a la outou auauna. E ui lava foi ina ua le tau lau o lo ta faamoemoe Aiga i le Tai, ua ou iloa lou finagalo. Ua ou iloa le mea e te loto i ai, ae peitai o le a le faia so ta loto, ua le o gatasi le futia ma le umele. A o le agaga e pei o le alaga a le tupu, "Apisaloma e, Apisaloma e, ta fia oti e sui ai oe, ta fia oti e sui ai oe." Ua malie le tautua, e masani e asu le ipuvai, ua masani e ati le afi. Se i tali le momoo ma le galala o lou itumalo, talofa ai a tatou le toe mafuta, o le a outou le toe faafofoga i si ou iuleo ae le tuua lau galue e faaauau pea leaga ua masani. Lou itumalo, ua ou manatu ua outou silafia le mea o agai i ai le lagolago. Ia manuia lau faiga filifiliga o loloma nei, pei lava ina outou faafofoga mai, o lea ua ave le lagolago i le susuga ia Mulipola Taupau Atonio, o se tasi foi o toa manumanu o lo o tautua i le Malo e oo mai le aso lenei. Ma e le fesiligia, e le tau laeia le maa e le tau faafuluina foi le pasina, ua outou silafia le Susuga ia Mulipola. Ia ave i ai le tatou faamoemoe aua le faiga filifiliga o lumanai.

Ona faapea lea, o le a faagata i i se tautalaga i lenei taeao. O lea ua toulua le taulaumea, ua mapu foi i le toa le soaiga na i le tuamasaga, aua o lea ua faatili foe mo le ae. Ua ite fanua a lalo ua sina le galu, ua toe o se aga ona tatou i ai lea i le taufaaiuga o lenei Palemene. A o le tala e fai i le faatufugaga a Sua, o lea ua mapu le urima ma le sausau ua teu mau foi au ma lalafi i lo

latou apimau. Ae talofa e pei o le tala e fai ia Sina le Fagagu. O au o Sina le Fagagu sa ou utuvai e te faalanu, talofa ailoga a e magalo. Ioe e te le magalo leaga ua na o se ua e toafuafu, a o le tai faanae e le lilo se fatu. Le Aiga i le Tai, o le a se mea ua mafai tau ina faitau ane ai, o lau pule ma lau faatofalaiga na outou tusiaao ai ou te saofai i lenei Paeaiga. Ua malo faafetai, faafetai i lau puleto o lea ua lagona ai sou leo i lenei Palemene. O ai lou tagata faatauvaa, ua outou manatu ai, ua outou sii ai le fale o Asomua i luga o le mauga. O le tatalo, ia i ai le agalelei o le Atua i le paia o lo tatou itumalo.

Ina ne i umi se tala, lau Afioga i le Minisita, lau Afioga Sili Epa, e le galo le mafutaga, e le galo le agalelei. I lou manatu ifo e pei ona tatou mafuta ai i lenei 5 tausaga, ua faamalo faafetai le tautua. Ua faamalo faafetai le faapalepale i le tatou feagai ai i lenei 5 tausaga, ia viia le Alii. O la matou tatalo, ia toe faatulai mai oe e le itumalo, aua le isi Paeaiga o lo o lumanai. Ia manuia le Fonousu a Samoa. Soifua.

*Na faaalua le agaga fiafia o le Palemene e ala i le patipati o o latou aao i le maea ai o le saunoaga a le Sui Usufono o le Aiga i le Tai.*

**FOFOGA FETALAI:** Malo faafetai, ua taliga e fia logo le saunoaga a le Afioga i le Aiga i le Tai. Malo o lea ua tautino le solo a le tamaloa, malo faafetai faafofoga tapuai mai le itumalo. Ia faamoemoe i le agaga o le Alii, ia faafetai foi i le tele o galuega ua mafai ona faatino e ala i lau talosaga ma le tuitui pea i le Malo, ua faapena ona faatino ai atinae i le itumalo. Ia malo faafetai malo galulue.

Malo faafetai o lea ua tulai mai le sui mamalu o Faleata i Sasae. Manuia le saunoaga a lau fetalai Salausa. Tulai maia e saunoa.

**Afioga SALAUSA JOHN AH CHING (Faleata Sasae):** Faafetai atu mo le avanoa i lau susuga i le Fofoga Fetalai, ae tulai i le ava ma le faaaloalo tele e tatau ai. E muamua ona faatulou i le Tafatolu Fefaatauagai a lo tatou Malo, i le susu o lau Afioga i le Fofoga Fetalai ma le paia o le Palemene, afio foi lau Afioga i le Palemia ma le Vasega o Minisita, Minisita Lagolago. E faatulou atu foi i le paia o le Faamasino Sili ma le Vasega o Faamasino. E faatulou atu foi i le faafofoga tapuai mai o Le Ao Mamalu o le Malo ma le masiofo. O le sui o le Fono o Sui Tofia ma le faletua. E faatulou atu foi i Aiga sa Levi, le au Ositaulaga ma faifeau uma i so o se Ekalesia i totonu o le tatou atunuu. E faatulou atu foi i le paia tele o le atunuu i le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, Aiga ma latou Tama, o Tama foi ma o latou Aiga. Ae tainane foi le faafofoga tapuai mai o le tatou motu i Sasae, le Faigamalo a Tutuila ma Manua, le Tafatolu o le Faigamalo, le paia o le Faleagafulu ae tainane le motusa i le Manuatele.

E faatulou atu foi i lou itumalo o Faleata Nu 1 lea ua i ai nei. Ma ua faaigoaina lava e lou mafaufau lenei itumalo, o se itumalo malosi. E sau se taimi ona ou oo atu la lea i ai. O le faafetai, ma o lenei lava taimi o le tatou Fonotaga, masalo o le agaga ma auga atoa o lenei Fono, e na o le momoli o le faafetai. E le gata o le faafetai i galuega sa fai, ae o le tatou mafutaga i lena 5 tau saga o le a mou atu.

E muamua le faafetai i le Atua, Le Atua Tolutasi Paia ona o Lana tausiga ia Samoa. Ma e lagona lava e le mafaufau ma talitonu foi i ai, e ese le fai mea faapito o le Atua ia Samoa. Ma e tele lava molimau ua tatou molimauina ai lea mea. Ae le tupu fua foi mea faapenei, ma e i ai le manatu o lo o silasila lava le Atua ma faafofoga ia Samoa i aso uma. E tulivae i le taeao, tulivae i le afiafi, tulivae i aso uma, tulivae i Aso Sa uma. E le tupu fua le alofa o le Atua, le tautua a Samoa. Ma o lea foi ua faamaonia e le Atua le Faavae o le Atua, e faavae Samoa i le Atua ona o lea ua i totonu o le tatou Faavae, le faavae o le atunuu. E faavae i le Atua Samoa. O lea ua talitonu le Atua, o lea ua i totonu o lona Faavae. E faafetai foi i le Atua i le tofofi o i tatou e tatou te mafuta ma tutupu ae ma alala i lenei vaega o le kelope o lo o tatou ola ma soifua ai. E faafetai i le tofi a le Atua na aumai mo i tatou, o Samoa o le tatou tofi lea. Ma ua aumai foi e le Atua le isi faiga e faamautu ai le tofi, o matai. Ma e malie ai upu o le pese, ua tofia e le Atua Samoa ina ia pulea e matai, ma o lona suafa ua vaelua i ai. E faapea le fati o le pese lea: *“Ua tofia e le Atua Samoa ina ia pulea e matai, aua o Lona suafa ua vaelua i ai.* Ia faagata mai ai i ina faafetai. O le mea lena, o matai, e faafefea la ona faaauau, e tatau ona faaauau le tatou tautua i le tatou Matai. E faapefea ona faaauau? E faaauau i le tatalo ma le anapogi, o lea ua amata mea le tatou Faigamalo i tausaga e fia. O fai lava lava le tatalo ma le anapogi. A o lea mea, ia e le faapea o le vaiaso e fai ai, e tatau ona faaauau i aso uma, aso uma, aso uma. O le tatalo e le tau alu i le falesa e fai ai se tatalo, e talanoa ia Iesu i so o se taimi. E te fealuai i lau taavale, faigaluega, talanoa ia Iesu le mea o le a fai. A i ai se agasala o le a tau foufou, talanoa ia Iesu. O le anapogi, e le tau faia foi ni anapogi e vaai atu tagata o tausae mai se anapogi, e leai. E anapogi lava i mea laiti, mea laiti. E tofi le aso ma le anapogi, anapogi nei i le faafiafia o lou uso a tagata, anapogi taeao i le faamaoni, anapogi i ona talaatu, aua le gaioia le taimi faigaluega. Ioe, a oo atu i le isi aso ia gaioi le taimi faigaluega, ae fai fai lava lelei. Ia tofi le aso ma le tamai anapogi ona tatou iloa lea o lo o faaauau le tatou tatalo ma le tatou anapogi i le Atua. O le a le mea lea ua i ai le lalolagi i le taimi lenei, ma mea ia e tau mai, sustainable development. O le sustainable lena, o le tatou tatalo ma le anapogi.

E faailoa foi le faafetai i le Tafatolu o le tatou Faigamalo, i lau Afioga i le Fofoga Fetalai, ua mua atu foi nisi o faafetai a sui usufono i lau Afioga ona o lou tulai mai. Ou te mitamita foi au i lou vaavaai atu ia te oe, o lou uso sa ma vasega faatasi. Ma o se faafiafiaga foi lea ia te au, ua leva ona ou matau

mai tausaga e fia o e tautua ai i totonu o le Maota leni. E faafetai ua ou maua mai o lea lava e te iinei i le Maota, ua faafetai tele. Ma e le tau selu atu, faafetai i le faatoatoa ma le tofilemu o le Maota. Le Afioga i le Palemia ma le Kapeneta, faafetai tele, faafetai tele i le Faigamalo i nei tausaga e 5. O le faafoefoeina o leni tulaga ma le tatou Faigamalo, o le matau lea i ai, e ese le agai i luma. E leai se mea o toa, ae o lo o agai pea i luma. E sau se taimi ona ou talanoa i le paketi e faailoa ma faamautu ai le mea lea. E faafetai foi i le Faamasino Sili ma le Vasega o le Faamasinoga, aua o la outou pito laau e le faigofie, aua o outou e toa atu i ai le atunuu. O outou e mapu atu ai aiga, o outou e filemu ai aiga, a sese le faaiuga, ona faapena lea ona malepelepe aiga. Ae o outou o le matafaioi e ese ma le taua, a pipii i le Atua e maua ai lo outou malosiaga.

E fia faaleo foi le faafetai i Matagaluega uma a lo tatou Malo, ona o outou foi aemaise o outou taitai, o outou foi o lupe faalele a le atunuu leni. O lea ua outou toe talii mai i fanua, ua avea outou ma Ofisa sili o Pulega o Matagaluega. Faamalo faafetai.

Ae fia faaleo sina faafetai faapitoa i nisi o Matagaluega sa tele lou fesootai atu i ai i leni 5 tausaga. O le Matagaluega o le Soifua Maloloina, faafetai i lau Afioga i le Minisita, le Faatonu Sili ma le paia o le aufaigaluega. I le tele o faafitauli sa feagai ma le Matagaluega i nei tausaga, aemaise 2019 i lona faaiuga i le misela, sau i le 2020 i le Koviti e oo mai lava i le taimi leni. O se tasi leni o tausaga ua luitau ai lo tatou atunuu, o le tausaga lea na tea atu nei 2020. E faafetai atu i nai Matagaluega ia e 3, o le Suavai, o le EPC o le LTA i taimi ia o faalavelave faafuasei na tulai mai aemaise lologa, faafetai tele lava. E faafetai tele mo le vave ona toe faafoia o nisi o faafitauli, o le toe faaleleia o auala na motumotu ona o lologa faapea le eletise ae tainane le vai, o le mea lea faafetai tele lava. E faafetai atu foi i le Matagaluega o Leoleo, le Komesina o leoleo ona o la outou galuega faifaipea aua le filemu ma le saogalemu o le atunuu. O le Komiti o Faalavelave faafuasei, e faafetai atu, faafetai atu i lo outou fita i le faafoefoeina o tatou malaga mai fafo. O i le Komiti leni faatasi ai ma le Soifua Maloloina, o outou o lo o pito i luma i le tatou mataupu leni, ma o lo o lamatia pea le soifua, ona o faamai pipisi mo i latou o lo o malaga mai fafo.

E i ai le faafetai faapitoa i si ou tama Minisita le Afioga ia Tuitama Dr. Leao Talalelei Tuitama, faafetai tele i lou tofia foi o au e fai ma au Minisita Lagolago, ma sa ta galulue ai i nei tausaga e 5. E faafetai ua tele foi nisi aoaoga ou te maua mai i lau Afioga ona o le ta mafutaga. E te le i tuulafoaina foi au, i se mea tatou te mafuta ai. O fea lava foi fesuaiga na fesuai ai le tatou Kapeneta, na e afio lava ma ave au, ioe, faafetai tele lava. A o ia mea uma, e ese le tele o le aoaoga na ou maua mai ai. O i le Matagaluega o Tina ma Tamaitai lea na ma i ai nei, ua tele foi lou aoaoga ua maua mai ai. Ma o lou foi iloa i lou faigaluega ai i lea Matagaluega, o se tasi leni o Matagaluega e ese le taua mo le atinae o lo tatou atunuu. O mea ia e taua o

sustainable development goals a le soifua maloloina a le lalolagi, o i e taiala. E taiala ai le Matagaluega o Tina ma Tamaitai, le atinae o Nuu ma Alalafaga ma Agafesootai, faatasi ai ma ana paaga. O le mea lea e faafetai tele atu foi i le Matagaluega, i le avanoa ua mafai ona ma faigaluega ai ma si ou tama ia Tuitama. Ae o le faafetai faapitoa lena i le susuga i le Minisita, o lea ua e litaea malolo manumalo mai le Palemene. O le tatalo ia alofagia e le Atua nisi atinae ma fuafuaga i le aiga ma le nuu ma le ekalesia, ina ia faataunuuna mea uma o lo o e faamoemoe i ai.

O le tatou paketi, o le Faatatauina o Tupe Faaopoopo, e leai se tala a lenei itumalo e toe faia i ai. E pau le agaga o Faleata Nu 1 e na o le faafetai, faafetai. O a ni tatou mea a fai pe afai e leai ni tupe e toe faaopoopo. Ae faafetai o lea e maua tupe e toe faaopoopo ai i le paketi. O le mea lea e momoli tele atu ai le faafetai i le Faigamalo, ona o le faapolopolo. O le mea lea ua ou manatu ai i le tala foi lea i le Tusi Paia. Na tau faamatala ai e Iosefa le miti a Falao fai mai, tulou le Maota. Ua ai e povi paeae e fitu ia povi ia povi pepeti e fitu. O i na ou mafaufau, atonu o i lea e taua ai le mea lenei o le faapolopolo, tatou te faapolopolo mo aso leaga, pe tatou te tapenapena mo aso faigata. Ma o le faapolopolo lenei i lau matau i le 5 tausaga, e le i ai lava se taimi ua pau ai.

Ona ou oo mai lea i le tausaga lenei 2020, lea na oso mai ai le faamai lenei o le Koviti, ua faamalau mai e le Afioga i le Minisita paketi laveai mo le atunuu. O lou nei sui usufono na matuai ofo lava. Lau Afioga i le Fofoga Fetalai, sa ou matuai ou ofo ma ou faafetai ifo i le Atua i lenei mea. Ma ou faapea, sole talofa e i le tele o lenei faapolopolo, ua mafai ona fai uma ai lava nei mea, toe totogi ma tatou aitalafu toe i ai ma tatou tupe faasili i fafo, e le i ai se mea o faaletonu. A matamata atu i le TV i le tele o atunuu, oi ua fai le laina, e o e tau sue ni meaai. O isi foi ua tele ina vaea le aufaigaluega a le Malo, o isi ua nonofo i taavale, ua nonofo i taavale ua le mafai ona totogi fale. A o le mea lena, ua tatou iloa ai le lelei o le faapolopolo o lea sa fai e le tatou Faigamalo.

O le isi lesona tele lea na fai mai nei e le Koviti i le tatou atunuu, ua laititi lava le lalolagi. Ma so o se faamai lava la faapea e tupu mai, a oo ina loka le lalolagi, e loka lava loka e le toe fealuai se isi. O i foi la, ua tatau ai foi i lo tatou atunuu ona paketi lava mea uma. O lona uiga ki ki i lalo manaoga, ki ki i lalo manaoga e le talafeagai, manaoga e faamaumau ai le tamaoiga, manaoga e faamaumau ai le malosi. Ia ki ki i lalo ae faaoga le malosi ma le tamaoiga i mea e tatau ona fai. O i ina foi i le paketi, paketi i so o se mea, o lea ua avatu e le Faigamalo le faataitaiga o le faapolopolo, faapena foi i totonu o tatou aiga, tatou te paketi mea uma i totonu o tatou aiga. Ia fetau i le faaalu ma le tupe maua, o le tele o le tulaga lea e i ai, e tele le tatou faaalu ae laititi le tupe maua. Ona tatou o lea e saili solo mai po o fea a maua ai le tupe e faatino ai o tatou manaoga. Ia fuafua o tatou manaoga i le tamaoiga tatou te maua, e so o se mea i totonu o tatou aiga. E oo foi i lau fanau, paketi

foi tamaiti paketi fanau aemaise ulugalii o lo o talavaou. Ia fuafua le aofai o tamaiti i le tamaoaiga e maua. Afai o le tamaoaiga e te maua e lelei ai le aoga a le fanau, e tau i luga i le Iunivesite, ua 20 ma ona tupu ia tausaga o le tamaititi e na o le toa-lua, ua lava le toa-lua o lau fanau. Ae a faapea e gafatia e lou tamaoaiga e pei ona ou faaaogaina lava, tulou le Afioga i le Minisita i au tautalaga e faisoo. Afai o lou tamaoaiga e lava ai tamaiti e toa-sefuluvalu, fai le sefuluvalu e leai se mea e tuu ai. Ae fua o le fua lena, o le mea lena e tau o le aiga fuafuaina, po o le family planning. O le aiga fuafuaina e faapena lona fuafuaga. Le atunuu, faamalo le onosai

**FOFOGA FETALAI:** Se i malie lava le sui usufono mo Faleata, se i tulai mai lava le Palemia, e manaia tele le saunoaga.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui:** Lau Afioga i le Fofoga Fetalai, o au nei lea e manao ia toatele ni tamaiti e faia le aukirikiti ma le aulakapi, ua tau leai ni tamaiti. E pau le mea na ou fesili ai...

**FOFOGA FETALAI:** E faale-maua atu le saunoaga a lau Afioga. E toatele au tamaiti?

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui:** O lea ou te fia fesili i le Minisita Lagolago a au, leaga e eseese ai la lana talaiga ma lau talaiga. O le faalavelave, e le o i ai i ni Faalapotopotoga o Taaloga le sui usufono. A o au la lea ou te i le Faalapotopotoga o Taaloga, o lea e alu lou mafaufau i le fesili lea na aumai, po o le a le mea ua faapea ai le Taitoafitu. O lea la ua ou toe te i i lou faalogo atu i le Afioga i le sui usufono, o la e taua lana faatupu manatu i le mea lea o le fua o le naunau e fai tamaiti i le tamaoaiga o lea e te maua. O le taua la o le mea lea, o lea sa saunoa mai, aua a sili ae le mea e te manao i ai ona e tigaina loa lea e te alu e sue se mea e faatino ai le mea lea. O le anoano o le vaega la e i uta i Tafaigata, e faigaluega lelei lava, e faigaluega lelei lava, ae talu ai le manao o matua, fai lelei le ta taulaga leaga o au lea e faia le Ekalesia, o au e faia upu. Ia ona alu loa lea o le teineitiiti lenei na o le \$70 i le 2 vaiaso, a o la e kesia i le isi kamupani, alu loa gaoui loa. A gaoui la, e le o se tamai gaoui, e matua tele lava, e faatino ai le manaoga o matua, ia toe faatino ai foi le manaoga o le toalua. E taua la le itu lena, lea ua laga e le sui usufono, ona o aso uma, o aso uma.

O nei i le taeao, ou te ala mai le taeao ua ta tonu lava le 7:00 ua tu foi le isi, se ou te manao faamolemole se i e fesoasoani mai, e fia fail au loan. Ou fai atu, alu i tai i le Ofisa e le faia mea na i i. A o lea la ou te faamoemoe e ave foi lau tusi i le Faalapotopotoga lea e fai ai lana loan, faamolemole, ave le fesoasoani lau faamasinoga e tataui ai in accordance with policy. Ia, ua iloa

lava la le iuga, a o le tulaga e taua, e fua le faaalu i le mea o lo o e maua. O le tulaga taua lena, a o le mea lea e nunumi ai lou faiai, o fea e aumai ai lau numera 18? O le mea ea o i ai se isi i totonu o le Maota lena e 18 lana... O le mea lena o lea ou e fesili ai. Aua e leai lava se isi, ou te le o iloa po o i ai se tagata o agai i ai le fesili. Afai e le i seia maia lau 18, e i ai le mafuaaga. Ia e pei la o le mea lena sa ou fesili ai, po o fea e sau ai ma lana 18.

E ala ona ou taua le mea lea, leaga o aso nei ua tele tagata e fai mea nuti, e ese lava le 2 mai i, ese le 4 mai o, lea e i totonu o le Maota. Ae ou te fia fesili po o fea e sau ai le 18, po o sau lava i luga o le tautoga. A sau i luga o le tautoga, o lena e lelei, ma ave le tatou faafetai i le Atua o le a toatele ni tamaiti e taaalo i le tatou taitoafitu.

**FOFOGA FETALAI:** Faamolemole lau Afioga, o lou aao lena e tusi ia Lautafi. O Lautafi po o Salausa.

Ia tulai mai Salausa, manaia e faatupu manatu le saunoaga. Ioe, manaia foi le saunoaga a le Afioga i le Palemia, ae lelei lava ona faasolosolo mai po o fea le sao o nei mea. Ia, ua iloa a e le tu lava i luga e le maua oe.

Ia, se i tulai mai le Afioga ia Sala.

**Afioga Hon Sala Fata Pinati (Minisita mo Tagata Tafafao Maimoa Mai Fafo):** Lau Afioga i le Fofoga Fetalai, e manaia foi lena taeao ua tatou toe ai. Masalo o le saunoaga a le uso, masalo e faatatau mai ia te au le vaega la lea e pei ona taua faapea e 18.

**FOFOGA FETALAI:** O oe la lea na tusi i ai le aao o le Palemia.

**Afioga Hon Sala Fata Pinati:** Se ou te faafetai i le Atua. O lea o le a ou faamatala atu lau tala moni lava i le mea na tupu a. O le matou aiga, na o le toatolu lava matou o le fanau, o le ulumatua au, o lou uso, o le tausaga atu lea na amia ai foi e le Alii, a o lou tuafafine e Monike lou tuafafine, o la e la e talai i Uea. O le talaiga foi la lea e alu ai e Monike e le toe foi mai i le aiga, e alu atu lava ma oti ai. Toe la o au lea e totoe o le aiga. A o le mea moni lava ia, faafetai i le Atua Silisili Ese, aua e i ai lava le toatele foi o le atunuu ma le lalolagi e leai ni fanau, a o se galuega ofoofogia, o le mafai ona ou tausia o le toa-18 ma faaaoga. O le mea moni lava o taimi uma ou te faapea ai, o lo o tupu lava vavega i totonu o le matou aiga i aso uma, aso uma ma ola ai lou faatuatua ma ou faapea ifo, o ai ea au, o ai ea au ua e alofa mai ai? E i ai le pese lea na taua foi e le Minisita Lagolago e faapea o le matai, lea e taua ai... A o le pese lea ou te nofo ma au, O le tulimanu o lou fatu e i ai le alofa, o le tulimanu o lou fatu. E ala ona ou fai atu o le pese lea: *“O le tulimanu o lou fatu e i ai le alofa.”* O i e faavae uma ai lava mea uma, i lou tautua lotu, tautua i le nuu, e faapena foi le fai o le fanau ma aiga, le tausiga.

Ona oo mai lea i totonu o lou tofiga, ou te faafetai ai i le Palemia i le tofiga o au, e fai lava mea uma, e fai ma lou talitonuga, ia fai lava ma le faamaoni galuega e tautua ai le Malo o Samoa ma le tatou atunuu. O le aso ma le tatou mafutaga, se faafetai i le Atua, faafetai i le Atua o lea ua agiga i malae a o faafofoga foi le atunuu, i lau fanau e toatele e toa-18. Ioe. Ae ou te faafetai foi o lo o maua e i ai foi le au valea o lau fanau, e i ai foi le au atamamai, a o le taua o le aso, o lea e faavae i luga o mea uma, sisila le Atua, a mama le loto, e foai foi e le Atua mea lelei mo oe. Ia manuia le tatou usugafono i lenei taeao.

*Na faaalua le agaga fiafia o le Palemene i le patipati o latou aao i le maea ai o le saunoaga a le Minisita mo Tagata Tafafao Maimoa Mai Fafu.*

**FOFOGA FETALAI:** Malo saunoa faafetai. O lea ua... o le faamanuiaga a le Atua e faapena. Faafetai lava.

Ia, se i tulai mai le Minisita mo Pisinisi, Alamanuia ma Leipa ma Faalapotopotoga Tumaoti a le Malo lau Afioga Lautafi.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Faafetai i lau Afioga i le Fofoga Fetalai. E manaia foi le fai ma fai nai a tatou commercial e faapuupuu ai le aso leaga o lea sa e taua lou igoa lau Afioga faapea o lea e tusi mai ai le aao o le Palemia, o au lea e toa-18, a o lea ua faamalamalama atu e lou uso, e le o i. O au ia e leai lava ni au mea nuti lau Afioga. O le faigata o le tulaga lea ou te i ai, leaga o le e nofo mai lou toalua i i. Ua leva foi ona ma valavala ma si ou toalua, o lea la ua masalosalo nei, ai o le taimi lea na alu ai i fafo, ai o tope ai ni nai au mea nuti i i. Ou te tauto atu lava e leai lava sata mea na faia, aua lava ne i e faalogo i tala ia e fai atu i i, e gata ai lava i i, aua foi ne i oo nanei e faamisamisa mai.

Ia, e faapuupuu ai le tatou taimi lau Afioga. Faafetai.

**FOFOGA FETALAI:** Faafetai. O lea la ua manino auofala, ma e faapena le Palemene, ioe, e i ai lava le taimi e saunoa tuusao mai ai lava ma kofesio ai lava i i ae malo faafetai. Faafetai lava.

Ma ou te fautuaina le Afioga i le Minisita ia Sala ma le Minisita Lagolago ia Salausa, i se taimi e maea ai le tatou Fono, tusi pese na e lua ma tuuina mai ia te au mo faamaumauga.

Ia, se i tulai mai Salausa e faaauau le saunoaga.

**Afioga SALAUSA JOHN AH CHING:** Faafetai mo le avanoa. Faafetai i le uso a Minisita ona o le faamalamalamaina o le tulaga lea, ma ua manino ai la le tatou faamoemoe, a o le mea aupito sili ona taua, e tasi le usuga, ioe, tasi le usuga, o mea mamalu la na.

O le faafetai i le tatou atunuu, aemaise le pulega mamalu a alii ma faipule, o faletua ma tausī, saoa ma tamaitai ma le malosī o le nuu. Faafetai i la outou galuega faifaiepa i aso uma, faafetai foi i lo outou onosai, aemaise i le pulega a alii ma faipule i lo outou onosai i vavao a le tatou Malo, ona o le tatou Koviti-19. O le isi lea vaega o tatou faiganuu ua faataua ai i lou mafaufau i le taimi lenei, o le malosī o le nuu. O lea tatou te tau o le malosī o le nuu, ma o lea foi tatou te taumafai ina ia maua uma ni galuega a le autalavou ma tupulaga. Ae i ai le isi vaega o le malosī o le nuu o lea e tua i ai le nuu i ana fonotaga e fai, i vaiaso uma, masina uma. O i latou la ia o lo o faia le fatuaiga i totonu o nuu ma alaalfaga. E faigata tele la i le vaega lea ona o e sue ni galuega tumau e fai ai ona o latou lea e tua i ai le malosī o le nuu. O i foi la e tatau ai foi ona tatou mafaufau i nisi polokalame sa taumafai i ai ina ia faatauaina ai le malosī o le nuu.

Ou te manatua lava o Satupaitea na aumai ai le finagalo lea o le autalavou i ni faiga mo le atinae o le tamaoiga mo tupulaga talavou. Na faapea mai lea o latou, e manaomia ni aoga faapitoa e aoaoina ai i le faiga o fagotaga, po o faigafaiva, mea faigofie ma le faiga o faatoaga, o mea e faigofie e mafai ona faatino e latou, faatasi ai ma le tautuaina o aiga ma nuu. O le isi la lea mea e tatau ona i ai i totonu o taiala o atinae o itumalo, o mea ia, o polokalame ia, ina ia faamalosia ai pe **empower** ai le malosī o le nuu, aua leaga o latou ia e tua i ai matai, e tua i ai faletua ma tausī i mea e fai i aso faiepa.

Ia, e faapena foi ona faafetai atu i Sui o le Malo, Sui o Nuū ma Sui Tamaitai o Nuū. E fia momoli foi le faafetai i a tatou atunuu o tatou faipaaga, atunuu mai fafo o lo o tatou faipaaga e mafua ai ona solosolo lelei le tatou atinae, o Niu Sila, o Ausetalia, o Saina, Iapani, o le Iuni a Europa faapea foi le United Nation po o Malo Aufaatasi.

E fia faaleoina foi le faafetai tele i nai ou aiga, faapea foi si ou toalua ma si au fanau ona o le lagolagosua i nei tausaga e 5 o lo o taumafai ai lenei lenei faamoemoe.

O le itumalo lenei o Faleata Nu.1, e i ai ona manaoga, tele foi ia o manaoga. O lea na ou taua i le amataga, o le itumalo malosī. E ala ona ou taua o le itumalo malosī ona o le toatele. O le faitauaofai o le itumalo i le 2016, e 13,109, a o lea lava e tupu, o lea ua 5 tausaga. O lona uiga, masalo foi ua toe faaopoopo nisi 1,000 se 2 pe 3. O le lola palota lea ua i ai i le taimi lenei ina ua tapuni e 5,032, ioe. Ae o lo o toatele nisi o lo o i totonu o le itumalo e le o resitala i lalo o le itumalo o Faleata Nu.1. O lona uiga, a resitala uma na tagata, ua oo i luga i le 6,000 pe a. Ia, o le isi lena malosiaga o le itumalo, ona o le toatele.

O le isi malosiaga o le itumalo, ona o le itumalo lenei, o lea e sau ai le malosī o lo o galueaiina ai galuega i totonu o le talafatai o Apia nei, totonu o le tatou Palemene, totonu o Matagaluega a le Malo, totonu o pisinisi ma falefaigaluega, e toatele o lo o alaala ma papaaao i totonu o le itumalo lenei.

E malosi foi le itumalo lenei ona o le malosi o le onosai, malosi tele le onosai, ioe.

**FOFOGA FETALAI:** Malo. Ou te faauilavea i le saunoaga a le sui usufono mamalu, ona o lea ua tatou taunuu i le tatou malologa. E i ai le manatu, malie le tofa i lau Afioga i le sui usufono, o le a faaauau le saunoaga pe a tatou taliu mai i le tatou malologa.

Ou te faasilasila atu ua faataatiaese Galuega a le Fono Aoa mo lana malologa masani.

*Na faataatiaese Galuega a le Fono Aoa Faitulafono mo lana malologa masani i le itula e 10:35 i le taeao ma toe faaauau i le itula e 11:33 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.*

**FOFOGA FETALAI:** Ou te faasilasila atu ua toe amatalia ia Tualumaga ma Galuega a le Fono Aoa Faitulafono. Ia malo le onosai, malo foi le galulue ma le usufono.

Ia e faia ia le tatou malologa o saunoa le sui usufono o Faleata i Sasae po o Faleata Nu.1 foi. Ou te tapa ma le faaaloalo lau Afioga i le sui usufono mamalu lau fetalaiga Salausa.

**Afioga SALAUSA JOHN AH CHING:** Faafetai i lau Afioga i le Fofoga o le Fono, ia atonu ua toe maua foi se isi faasiligamalosai o le tatou Palemene i le taligasua o lenei taeao.

Ae ou te le i alu loa ua i ai nai isi mea ia ua pau ia te au. O le faamaoniga o lau mau lea i le Afioga i le Minisita i le fanau lea e toa 18, ona o le pine e faamau ai le lava o le tamaoaiga, e mo le fanau. Ma o aoaoga a nei fanau e toa 18, na oo lava i le mea e gata ai aoaoga. Ma o le pine o lea faamoemoe, e toa 3 fomai, e toa 3 fanau e fomai. E toa 2 loaia, e i ai ma le tagata faapitoa i le faletalavai, saienitisi i le faletalavai. E i ai foi le tagata e saienitisi i totonu o le fale suetoto. Ia ma le vaega e fai pisinisi. Ioe, e pei o faamaoniga na, o le tamaoaiga e fuafua i ai le malosi o le paketi.

O le paketi foi i le tatou atunuu, ua tatau nei lava ona tatou paketi i so o se mea. Paketi le vai, paketi le eletise, paketi meaai so o se mea, ona o le faiga lena, ina ia fuafua i lo tatou tamaoaiga. Ua tele foi nisi o aiga o feoai lava ona e faapea mai e manaomia se tupe e totogi ai le pili o le vai ua tipi. Ia ae o le mea foi la lena, ia o le fautuaga foi lea sa ave i ai i nai aiga ia, e tatau

ona paketi lelei le vai. A faapea e taele, se i vae atu le paia o le Maota, na ona uma lava ona ki le paipa, uma na faasusu le tino, faaoa le pulu, ia taele loa, tape le paipa. Pe ki ki i lalo le paipa e na o le faasinasina lava le mea e toe faasusu ai le pulu. Ae taele loa le tino e faaoa uma le tino ma taele. A uma loa lena, ona faatoa toe ki loa lea o le paipa, e faamama ai le tino. Aua ne i taele ae o la e alu ai lava le paipa ae la e fufulu isi... ioe, ae tape e sefe le vai.

E oo foi la a faapea foi e le mafai ona fai lena tonu ona o le faigata tele tamaiti, ia fua, ki lava le pakete a le tamaititi ia e taele ai. Ioe fuafua lava faapena, paketi faapena le faiga o le vai. Ia fua o le tagata ma lana pakete e taele ai. Ia faapena foi ua tele foi o le mea lea ua i ai tatou, o faleese foi lea faleletaua, ua tele lava ina faaaoga foi ia falepapalagi.

O aso ia o falepisikoa, ia e paketi foi i ina le vai aua e tasi foi lava le apa foi lea o le pisupo 6 pauna, ia sasaa i totonu ma tafi atu ai ia faaeleeleaga foi lea ona toe lelei foi lea, paketi ai faapena le vai. O i i foi la, o le aikia foi na e tatau ona tatou faaaoga i falepapalagi ia. A faapea o le galuega lea sa fai o se galuega mama, ia aua ne i uma ai ia le tane tele lea o le vai i le galuega mama lea. Na ona oomi lava toe tuu, ioe oomi toe tuu ia alu atu na o se vaega e toe tafi ai ma faamama ai le galuega mama lea. Ioe, ae aua le oomi lava seia uma le tane. E le tatau ona uma le tane atoa lea, i se galuega mama. A faapea o le galuega mamafa, ia fuafua foi la i ai le vai e tatau ona faaaoga.

A o mea e pei o faataitaiga na, o mea e tatau ona tatou mafaufau ai i le vaitaimi lenei, leaga o le mea lea na aumai e le Koviti, sau le Koviti ma aumai le faataitaiga ia i tatou. E pei ua tatou oo i tulaga ia e masani ona fai e isi Ekalesia, o aso mafaufau. O aso mafaufau lau Afioga i nisi o Ekalesia, e faaavanoa ai se vaiaso e tasi, e o ai ia auositulaga pe o ai faifeau e toe mafaufau, ma toe tepa i tua ma toe vaai i le faasologa o le soifuaga ma le olaga ma le galuega o fai, ma toe fatufatu le lumanai.

E peiseai o le 2020, lea na i ai nei Samoa, ou te manatu au o aso mafaufau lea mo Samoa atoa. E tatou te toe mafaufau ai, po o fea o agai ai o tatou olaga, ae faapei ona faavasega o tatou olaga. O lea foi ua aumai ia le faataitaiga lea, ina ia tatou nofouta i ai. Tatou ola puipua, tatou ola faapolopolo, i mea uma o le tatou olaga lenei.

O le mea foi la lea i le faapolopolo foi a le Malo lea sa fai nei i paketi ia laveai, e ese le manaia, ese le matautia. Ae e le mafai ona fai pe ana faapea e leai ia se tatou faapolopolo. E le gata i le faapolopolo i totonu o Samoa, ae o le tatou faapolopolo lea i fafo. O le tatou foreign exchange lea e i fafo, ua matua lelei lava. O lo o lava e ave ai tatou e sustain ai tatou ae le i... e faatalitali ai nisi fesoasoani e oo mai.

Na amata mai le tatou Nofoaiga lenei, i lau matau sa i ai i le tatou faapolopolo lea po o le tatou tupe lea o lo o faaagaga i fafo, sa i lalo o le 3 masina. E faasolosolo mai lava i tausaga ia ua tuanai atu, oso i luga alu i luga i le 4 masina. Alu atu le isi tausaga ua sau ua 5 masina. O le tatou lipoti lea

mulimuli nei, o le tatou faapolopolo lea e i fafo o le tatou tupe lea e i fafo, ua oo i luga o le 6 masina. O i ina o lea e tau mai ai, le lelei ona faafoe o le tatou tamaoaiga ia ma le lelei ona faafoe o le tatou faapolopolo, i le tatou Faigamalo.

O le... na ou toe sosoo atu lea o le tulaga lea i lou itumalo, lea na ou taua ua ou faavasegaina lava e au ia o le itumalo e malosi, ia ona o le toatele o tagata o lo o alala ai. E faapena foi ona malosi ona o le tele o le onosai. E faapena foi ona malosi ona o le tele o tagata faigaluega o lo o i totonu o le itumalo lenei.

O le malosi lea e onosai ai le itumalo lenei o le fesuaiga o le tau. O fesuaiga o le tau, lea ua tele ai faafitauli i totonu o le itumalo i vaitafe ma auala, faaleagaina auala, ua tele le vaitafe ma ua faaleagaina ai le tele o meatotino o tagata taitoatasi i totonu o le itumalo. E amata mai lava i uta i Moamoa Fou, o nisi o aiga sa o matou asi ai, ua alu ese lava le tele o vaega o fanua. Ua alu ese atu foi ma pine o le fanua. I le auala lea na motu i uta i Moamoa Fou, o nai aiga na e 3 e i gatai mai, o nai aiga na ua leai ni pine o fanua sa i luga o le vai. Ua ave uma e le vai ia fanua na e 3. Ioe, e faasolo mai lava i tai mai, e i ai nisi o aiga ua uma ona tapueina mai ia ata, ua uma foi ona fai ai le lipoti a le itumalo, ua sameme lava vae atu le Maota, ia le fale, i luga o le auvai. Ua leai se floor ua ave e le vai le floor ae o la e sameme ai i luga ia apa o le faasee. Ua leai se... e faapena e tele lava tulaga faapena o lo o i ai. Ma e o le tulaga foi lenei, ia o lea ua uma ona fai mai le lipoti a le itumalo i mea sa faaleagaina i lologa ia ua tuanai atu nei, e faaopoopo mai foi i lipoti o mea sa faaleagaina i le afa o Kita. Ma e o mea lava ia o ala vaitafe ia ma auala, ma auala feoai.

O le tulaga lea i le fesuaiga o le tau, ou te iloa o se faafitauli lenei e le toe faaitiitia. Ma o se faafitauli ou te manatu o le fai fai pea i tausaga ma tausaga i lumanai. E pei ua tau i ai se manatu po o le a se finagalo o le Taitai ma le tatou Faigamalo, pe le ua tataua ona toe i ai se isi vaega o le Matagaluega, e faapitoa lava latou agai i fesuaiga o le tau ma mea o lo o... ina ia fai ia le... O le matou talosaga lea na aumai mulimuli i le Faigamalo, pe le tataua ona o atu ni inisinia, se i fai se lipoti o mea uma ia ua faaleagaina i lologa, ina ia i ai le lipoti lea, afai o le a se taimi mulimuli ane, o se tatou talosaga i fafo, o lea ua i ai ia le tatou lipoti tusinga.

Ma e o le tulaga foi lea e i ai, o le faafitauli i vaitafe, e matua matautia lava. Ma e ou te leiloa foi, pe faafefea ona faaleleia le faafitauli lea, aua o ala vaitafe, e fepiopiai, e fepiopiai ala vaitafe. Ma ou te leiloa pe faafefea ona faasao nei... aua o le mea e tataua ona i ai, pe a faapea e faafoia le faafitauli lenei, o le faasao o alavai, faaopoopo ai ma le faamaualuga o augutu o le vai. Ma e o mea ia, e talafeagai la i inisinia ona fai ai se lipoti. Ma e ou te manatu foi au, masalo ua oo mai foi le vaitau, o le taimi e tatou te manatunatu ai i ni fofo fou. O faafitauli lea ua tutupu mai o faafitauli fou o le suiga o le tau, ia ua tataua foi ona tatou mafaufau i ni fofo fou. E i ai foi le tulaga foi lea

innovative thinking, ua tatau foi ona tatou mafaufau e saili nisi faiga fou e faafoia ai faafitauli nei.

Na taua e le Afioga i le Palemia ia le nuu lea o Holani po o Holland. Sa ou asiiasi i ai foi i luga o le initaneti, ona o le mafaufau lava i se fofu e fofu ai le mea nei. O Holani e pei ona taua e 1/3 o Holani e i lalo o le sami lo latou eleele. E maualuga le sami ae e maualalo le laueleele lea. Ae o le faiga a Holani ua fai ai ia le latou faainisiniaina o le latou nuu, matuai malupuipua ai le atunuu i mea ia e pei lava ona taua e le Susuga i le Palemia.

Ae o le mea la e tasi na ou maua mai ai i mafaufauga ia ma metotia a Holani, o le mea lea o le mafaufauga lea o le water management po o le faafoefoaina o le vai. O le latou filosofia, e le aoga ona tatou e pe i tatou te faasagatau i le vai, ae ia tatou galulue faatasi ma le vai, aua o le tatou faasagatau i le vai, e moni lava, ae e i ai le taimi e gata ai ia lo tatou malosi, ae iu lava ina toe manumalo le vai. O lea lava e maua foi i nisi foi faaupuga a lo tatou atunuu pe a oo i mea faapenei, 'a oo ina fai sau lologa, e sue lava e le vai lona auala'. E faapena, o lona uiga la o le mafaufauga lea, ia aua ne i o tatou taumafai e tatou te fusu faasaga i le vai, ae ia aumai le vai e tatou te galulue faatasi.

O lona uiga o ni mafaufauga fou, pe tatau ona faatu ai ia se isi a tatou lala lea faapitoa mo fesuaiga o le tau, ina ia mafaufau sao ai lava i le mea lea, i mea ia pe faafefea ona tatou faia mea nei? Pe faafefea ona tatou faia mea nei? pe faafefea ona tatou faasaosaina ia alavai? Ioe, ae o le mea lenei, ia tatou galulue ma le vai. E tatou te fesili pe afai e tatou te fia galulue ma le vai, e tatau ona tatou iloa o a uiga o le vai? O a taga a le vai? O a aga a le vai? O a foi mafaufauga o le vai?

Ioe, ona tatou galulue lea faatasi ma le vai, e faaoga mea ia e fau ai ni faiga fou e puipui mai ai i le vai. Ae a tatou faasaga tau sao i le vai, e fai mai le filosofia lea a Holani, e tatou te fiu e fau ni puipui e tau i fea le maualuga, e le mafai ona foia le faafitauli lenei. Ae o le mea lenei, e taatia atu i le Taitai ma le tatou Faigamalo, pe le o i ai se taimi a o se tulaga e tatau ai ona faapitoa lava lenei fuafuaga i tatou fesuaiga o le tau. O aiga foi la ia o lo o aafia i vai piopio nei, aua o lona uiga e tatau ona mafaufau i se tulaga. A le mafai ona re-locate ia nai aiga ia i se isi mea e saogalemu, o le fai o se isi fuafuaga i auvai ia o lo o tafatafa ane. Ma o le itumalo foi lenei, e toatele foi o nisi... a i ai nisi o le Maota lenei o papaaao ma alala i totonu o le itumalo lenei, ia fesoasoani i le tatou polokalame lenei. Ia fesoasoani e lauga mai oe i le alavai ma le vaitafe ma le auala na e i tafatafa o lou Maota, ioe, e faamalosi ai le tatou faaupuga lenei.

Ma o le itumalo foi lenei e 2 nuu mavae, o Vaimoso ma Lepea, ae 13 pitonuu ma nuu o nuu paia. O nuu paia ia, ua ala ona ou taua o nuu paia ia, ona o le mamalu o le atunuu i tupu ma ee o le atunuu, o lea ua o latou filifilia Faleata Nu 1, e fai ma o latou nofoaga, aua le atinae o aiga ma fanau. O le mea lea, o le isi malosiaga ma le tele lenei o le itumalo lenei.

O le tatou vaa e fau faatasi. E sao lava e i ai lava feeseeseaiga o tatou manatu i le tele o mea, ae manaia foi le feeseeseai o tatou manatu i totonu o le tatou Palemene, ae ia agai i luma a tatou foe. Ia tatou malaga i le tatou sa po o le tatou vaa lenei, e gatasi a tatou foe. E tatou te finau ae tatou te alo agai i luma le tatou vaa, e tatou te alo agai i luma, ae aua ne i o tatou finau i se tulaga, e alo isi i luma ae alo isi i tua. Ona aisea, o le a le mea e tupu ai? E matelaina le pasese, e matelaina ai le pasese o le vaa i le tulaga lea o le alo o isi i luma ae alo isi i tua. A o ai le pasese? O le atunuu la e tapuai mai, o le tatou pasese lenei, o le tatou pasese lenei. E po o le a la le feeseeseaiga o tatou manatu, ae ia o tatou feeseeseai ina ia sologa i luma le tatou vaa. Ia sologa i luma lo tatou sa, ae aua ne i tu pe agai i tua. Ae faafetai tele i le tatou Fono Aoa o sui usufono, ona o le galulue faatasi.

O se tala i le itumalo...

**FOFOGA FETALAI:** Ou te vaelupeina le saunoaga a lau Afioga i le sui mamalu, se i tuu atu i le Palemia mo se lafo e faagaoioi ai le tatou galuega. Tapa ma le faaaloalo lau Afioga i le Palemia.

### **LAFO MO LE SUIA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, ou te faamalulu atu i le sui usufono o lo o sausaunoa nei faamalo foi i le lauga, ua matua usi lava le faafogafoga a lo tatou Maota nei. Ae le tuua ai le agaga foi ia te au ma le Kapeneta, e tatau ona faavave uma le tatou paketi, o lo o talanoa nei i le aso. O lona uiga e mafai ona alu lava faasoloatoa se i pasi lava uma.

Ae i ai mea e tutupu i lo tatou olaga, e alu ma taofiofi ai, ma toe fetuunai ai ia manatu, fai mai e matutua, “o le uta a le potu e fetalai’i.” O lea la ua mafua ai ona ou tulai atu, e faatu ai le lafo lenei. Talu ai ona ua faailoa mai, toe sauniga o se tasi o tamalii sa avea ma sui usufono o le Palemene lenei, o lona toe sauniga lea ua faasalalauina mai. O le vaiaso fou o le a faatino ai, ae e i ai le sauniga faale-malo e tatau ona fai, mo so o se sui usufono o le Fono Aoa o Faitulafono, ua valaau mai i ai le Atua. O aga ia faa-Palemene, e ao ai ona faaalua le faaaloalo, ma faatino ai le sauniga faale-Malo, e ono auai nisi o le Palemene lenei. Ou te faatu atu ai le lafo, *Ina ia tolopo nei Taulumaga a le Fono Aoa o Faitulafono i le aoauli nei, seia aulia le Aso Lua le aso 26 Ianuari 2021 i le itula e 9:00 i le taeao.*

Lau Afioga o le lafo lenei mo le faamaoniga e le Maota. O le Aso Gafua, lea e faataunuuina ai le sauniga o le tatou uso, sa tatou nutimea faatasi i le Maota lenei. Mo le manuia auiluma e le gata o le itumalo, ae faapea foi le atunuu atoa. Lau Afioga o le lafo lenei.

**FOFOGA FETALAI:** Malo faafetai, ua faatu mai le lafo ma ua faaluaina e Minisita o le Kapeneta. Ina ia faamaea le tatou galuega nei i le 12:00 i le aoauli, i le tulaga masani e manava ai tatou galuega pe a tatou taunuu i le Aso Faraile. Ae ia tolopo mo le Aso Lua o le vaiaso fou. E tauaunoa le Aso Gafua, ae faatoa usua le tatou Fonotaga a le Palemene i le Aso Lua, i le itula e 9:00 i le taeao, ona o nisi o mafuaaga tatau. E pei ona le po se lilo, i se tasi o sui usufono ua faapena ona faamuta ma faamanava e le Atua feau ma galuega, ia le tofa ia Fiu Loimata.

O le a faapena ona faatino, ma o lea ua faaluaina mai.

*Faaluaina e Minisita o le Kapeneta.*

*Na faamaonia le lafo.*

**FOFOGA FETALAI:** O le a faapena ona manava galuega i le aso i le tatou Fonotaga i le itula e 12:00, toe tauaofia le Palemene i le itula e 9:00 i le Aso Lua o le vaiaso fou. Ona faatoa toe faaauau ai lea o le saunoaga a le Afioga i le sui mamalu. Malo faafetai saunoa, i le tapuaiga a le itumalo.

Ae tatou te le i tolopo ou te tapa le susuga i le sui usufono mo Falelatai ma Samatau, na te faaiuina la tatou Fonotaga i se tatalo.

*Na tolopo Taulumaga a le Fono Aoao Faitulafono i le itula e 12:00 i le aoauli seia aulia le itula e 9:00 i le taeao o le Aso Lua, 26 Ianuari 2021.*